



PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS
ANG Paghimakas
GINAUBAYAN SANG MARXISMO-LENINISMO-MAOISMO ENERO 2022

EDITORIAL

Kolektibong mobangon gikan sa kadaut sa super bagyong Odette ug pukanon ang pasistang atake sa rehimeng Duterte

DUL-AN NA DUHA KA BULAN ang milabay sukad nga mihapak sa Kabisay-an, sa isla sa Palawan ug ubang bahin sa Mindanao ang super bagyong Odette, apan ang kagutom, kawalay balay ug pagkawala sa panginabuhian padayong gisagubang sa mga surbaybor niini. Partikular sa isla sa Negros gibana-banang 300,000 ka pamilya sa Negros Occidental, lakip na ang dakbayan sa Bacolod, ug moabot sa 100,000 ka pamilya sa Negros Oriental ang apektado. Ibabaw ug labaw sa ilang kalisdanan dala sa pagkuso-kuso sa super bagyo, hilabihan ang ilang kayugot sa pag-abandona na usab kanila sa rehimeng Duterte ug gipasagdan lang sila nga morekober sa ilang kaugalingon.

Ang ayuda gikan sa gobyerno wala halos makaabot sa lamesa sa pinaka-kabos nga Pilipino. Nadunggan nila ang daghang walay unod nga pasalig gikan sa mga lokal nga opisyales nga sagad mahitabo panahon sa eleksyon. Kasagaran kanila nakadawat lang sa ginagmay'ng kilo sa bugas ug pipila ka sardinas ug noodles. Hangtud karon, daghan ang wala nakadawat sa ayuda sa gobyerno, ug kon nakadawat man, wala silay mahimo gawas sa pag-sunod sa istrikto kaayo nga mga rekisito. Dili kini makatabon sa nagkagrabe nga sosyo-ekonomiko nga kondisyon nga karon nagpaantus sa katawhang Pilipino.

Giangkun ni Duterte nga ang pundo sa iyang gobyerno nahurot na, ug sama sa naandan, iyang gibasol kini sa pandemyang COVID-19. Ang iya dayong tataw nga sulbad niini mao ang pagpangutang sa World Bank disaster financing loan aron pundohan ang ayuda sa gobyerno para sa mga biktima sa Odette nga naghatag niya og dugang kwarta nga ibulsa isip pagpangandam sa umaabot piniliay.



Samtang, ang masang mag-uuma, nakigbugno kada adlaw para sa ilang panginabuhian human nga maguba ang ilang panimalay ug uma sa bagyo, nagpuyo sila ilawom sa kahadlok taliwala sa militarisasyon sa ilang mga komunidad. Ang militar ug kapulisan padayon sa paglunsad sa mga tipong-Sauron nga pagatake sa tibuok isla sa Negros bisan sa wala pa ug pagkahuman mokusokuso ang super bagyo. Gipatay ug gibalhog sa prisohan ang mga inosenteng mag-uuma tungod gidudahan sila nga mga tigsuporta ug sakop sa NPA. Ang mga relief goods ug kwarta nga hinabang gihimong hinagiban sa NTF-EL-CAC ug iyang mga *Community Support Program*. Ang pagapod-apod sa mga relief packs gigamit aron pagdani sa mga mag-uuma nga motambong sa mga pulong-pulong diin didto gideklarar sila nga mga NPA "surrenderees." Ang mga mibalibad nga motambong gihulga nga pasakaan og mga hinimo-himong kaso.

Gipahamtang ni Duterte ang mas dakong pag-antus sa katawhang Pilipino nga mas grabe pa sa usa ka super bagyo. Hakog niyang gikawkaw ang panudlanan sa katawhan ug kriminal nga gipasagdan ang kaayohan sa katawhan taliwala sa pandemyang COVID-19 ug pagkahuman sa mga natural nga kalamidad. Iyang giimposar ang labaw nga ngil-ad nga mga kontra-katawhan nga neoliberal nga palisiya nga nagpabor sa dakong negosyo ug nagbalewala sa tinuod nga reporma ug sa yuta nasudnong industriyalisasyon. Binilyon ang iyang giusik-usikan alang sa mga gastoso nga kagamitang militar ug mga operasyon para sa iyang kontra-rebolusyonaryong giyera, usa kini ka bangis nga kampanya sa pagsumpo sa halapad nga masa ug pagpakalma sa ilang

pagbatok sa iyang tiranikal nga paghari.

Sa pipila ka bulan matapos na ang rehimen ni Duterte. Tataw nga mangita siya og mga pamaagi aron iseguro ang iyang kaugalingon ug iyang pundok pinaagi man sa pagpalawig sa iyang paghari diha sa pagpahamtang sa balaud militar o pagseguro sa kadaugan sa eleksyon pinaagi sa pagpanikas ni bisan kinsa nga makahatag kaniya sa pinakadakang bentaha nga mogarantiya sa iyang kagawasan ug proteksyon.

Kinahanglang idemanda sa katawhan ang pagpatubag kang Duterte ug sa iyang mga bata-bata samtang anaa siya sa gahum ug bisan sa pagpungko sa bag-ong presidente sa reaksyonaryong gobyerno. Kinahanglang dili siya tugotang makaikyas sa pag-atubang sa iyang mga krimen batok sa katawhan.


Samtang, ang mga biktima sa super bagyong Odette kinahanglang kolektibong moduso sa ilang hinanaling demanda para sa pagkaon, pabalay, abag sa panginabuhian ug uban pa nilang batakang panginahanglan gikan sa ilang mga lokal nga gobyerno. Kinahanglang magorganisa sa ilang kaugalingon ug magtinabangay sa matag usa padulong sa pagrekober samtang gikonsidera ang mga lakang paglikay sa COVID-19. Mahimong makiglambigit sila sa mga makikatawhan nga organisasyon ug institusyon nga andam mohatag sa ila og abag ug rekurso.

Ang mga rebolusyonaryong pwersa sa kasyudaran ug kabukiran, sa pikas bahin, kinahanglang moabag sa mga paningkamot sa ayuda ug rehabilitasyon. Kinahanglang motabang sila sa mga biktima sa Odette sa pagpaduso sa ilang mga katungod ug kaayohan ug ipataas ang ilang pulitikal nga kaamguhan. Ang mga kampanyang masa alang sa re-

porma sa yuta ug produksyon sa pagkaon kinahanglang dungan ilunsad uban sa demanda sa pagpahunong sa makadaut nga pagmina ug pag-quarry nga dako ang natampo sa grabeng pagkaguba nga mugna sa super bagyong Odette sa Central ug Sur nga bahin sa Negros ug ubang bahin sa nasud.

Kinahanglang aduna usab mga pangmasang kampanya sa pagkondena sa kuyanap nga militarisasyon sa kabukiran labi pa karon nga ang mga pwersa sa estado mideklarar og usa ka "katapusang duso" sa pagpatuman sa ilang inutil nga kontra-insurhensyang kampanya hangtud sa Hunyo 2022. Ang grabeng kalapasan sa tawhanong katungod sama sa ekstrahudisyal nga pagpatay ug pag-salvage, ilegal nga pag-aresto, pagpang-abduct, tortyur, pugos nga pagpasurrender, pag-okupar sa militar sa mga komunidad, pagpangbomba, pag-

ENERO 2022

ANG **Paghimakas**

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga magamot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswag.



angpaghimakas@yahoo.com



negrosrevportal.wordpress.com

himo nga hinagiban sa mga *relief* nga paningkamot, pagpang-*red-tag*, intimidasyon ug pagpanghulga kinahanglang ibutyag hangtud sa internasyunal nga komunidad.

Ang NPA, samtang padayon nga nag-abag sa mga paningkamot sa rehabilitasyon ug pagtubag sa mga ekonomikanhong panginahanglan sa masang mag-uuma, kinahanglan nga magpursige sa pagpanalipod sa ka-

tawhan gikan sa mga teroristang pag-atake sa *Armed Forces of the Philippines* (AFP) ug *Philippine National Police* (PNP). Kinahanglang ilunsad nila ang mga taktikal nga opensiba aron hatagan og hustisya ang tanang biktima sa pagpanglapas sa tawhanong katungod ug aron pakayason ang atake sa mga pasistang pwersa sa estado nga nagtumong sa pagpukan sa rebolusyonaryong kalihukan.

Ang malahutayon nga pagrekober gikan sa kadaut sa super bagyong Odette ug pagpaisa sa ekonomikanhong kondisyon dili maangkon ubos sa dunot nga alang-alang kolonyal ug alang-alang pyudal nga sistema. Ang tiraniya, pasismo, korapsyon ug pagka-inutil ni Duterte nagpamatuod sa panginahanglan sa demokratikong rebolusyon sa katawhan. **AP***

